



AG

Haar naam is

vrou

– Francis Grobler

sy staan op die dryfsand van drome, sonder om te sink  
in die reën, sonder om te roes  
tóg weet sy dat die dogters van die aarde  
steeds vir die reuse moet koes

*wie's die een met die vuil verbande - met die rok wat ruik na rook? hulle sê haar naam is vrou*

haar susters het gesterf aan asemnood  
onder klippe en vlamme in brandstapelrook  
want die vrou wat sou praat by die tempelpoort  
is kragtens die wet op swye gedood

sy 't haar sole oor die werwels van die berge gesny  
té dikwels het haar hart agter gebly  
gekruip deur die dorings om dit terug te kry  
in die loopgraaf van die liefde in die ploegvore van pyn

*wie's die een wat die waters van haar trane seël? hulle sê haar naam is vrou.*

haar kussingsloop is soms gevlek  
waar die seerste druppels uit haar lyf uitlek  
want die oggend was te laat en die nag aspris  
sy sal sê dis die dou wat aan haar wimpers sit

sy bereken die skade - kalibreer haar traan  
as die lewe met sy voet op haar keel kom staan  
sy meet dit af in geheimetaal  
ver van die oë van die waterfiskaal

*wie's die een wat die taal van die ouboom se wysheid ken? hulle sê haar naam is vrou*

die kolke van haar kyk is uitgereën  
oor die harde kontant vir die sagte leuens  
en vervatte waarheid en voorlopige troos  
wat die wêreld in sy winkels aan die vroue verkoop

sy weet dat die mens deur meters vernis  
'n duisendkeer vervel voor hy weet wie hy is  
sy weet dat die vismotte gate vreet  
deur die duur fluweel van n kanselkleed

sy sê leef is die plek tussen graf en wieg  
wat verdwaal 't in 'n wêreld wat aanhou lieg  
met 'n komplekse opbou en 'n skielike slot  
is die doodskleed ons laaste partytjierok

want die wêreld knip sy dogters uit kreukelpapier  
die papierpoppe dans nader – ál nader aan die vuur  
maar sy weet dat vuur 'n ondier is  
en die trane van spyt nie 'n vuur kan blus

*wie's die een – die surrogaat, wat die vlae en vlieërs van hoop laat vlieg? hulle sê haar naam is vrou*

sonder navigasie of kompas - ongekaart  
word sy tééngravitasie vir 'n gitswart nag  
want sy bid in die lig van 'n dooie kers  
brand gate deur die kake van die swart kombers

tussen oesreste en skroot  
skrop sy vir die oorskiet van hoop - haar bloes oopgeknoop  
maak dit groot - soog dit aan die bors  
want Godweet! die wêreld is dors

***wie's die een wat 'n trooswieg van vrede vleg? hulle sê haar naam is vrou***

die dooie ster wat spartel op die grond  
steek sy aan met die sonne wat sy dra in haar mond  
elke droom wat verskiet in die massamoord  
skroef sy terug in die lug waar dit hoort

vir die kind met die lakens oor sy kop  
gooi sy fakkels in die skagte - hou sy sonne op  
want die kind moet sien – die kind moet leer  
dat dit vrees is wat die spoke fabriseer

sy't haar vlerke vir die wees uit haar lyf geskeur  
toe sy hoor hoe die strate van sarfat ween  
haar letsels verfraai met kruisiesteek  
maar die oliekan bly vol en die kruik vol meel

***wie's die een met die fakkel in die hand – die kryger wat in die skadu staan?  
Hulle sê haar naam is vrou...***

die vrou praat minder as wat sy weet  
haar skouers sal breër as die man s'n meet  
want haar swaarde is gesmee in vuur en bloed  
daar's kaggels in haar keel – sy swets as dit moet

en snags aan die son se agterkant  
sal jy beitels hoor – 'n lamp sien brand  
waar sy wegkap aan die eelte aan haar binnekant  
met kleur en kwas en ink en klank

die vrou sal 'n bottel sjampanje koop  
dit breek teen die boeg van haar eie bors  
die waters van die wreedste seë klief  
dieselfde see wat haar skommel in sy kies

want die vrou stryk haar vlerke in die nag  
verf die kreukels en die merke met vuurvaste glas  
haar koers is vas want sy weet vandág  
is nader aan môre as wat gister was

***hulle sê haar naam is vrou... en as die laaste son homself uitbloei in die weste...***

sal sy sit langs salomo – klaarskryf aan die spreuk  
sy in afrikaans – hy in hebreus  
net hy en sy en God sal weet  
waarom die aarde 'vrou en moeder' heet

***hulle sê haar naam is vrou***